

Vo A - Z

Analog zu üsem Jahresmotto, «mir fiire»
 hets au im 2023 vüu ghä zum Jubiliere
 Einiges isch gloffe und so zäme cho
 aues das, möchte ig euch jetzt nomou z'Ohr lo cho
 es mag si, dass Revue isch nid ganz komplett
 vo mir drum do die wichtigste Highlights vo A-Z

A	Abstimmigsresultat	Mir freue üs, ihn zträge zum trainiere und üs dermit au z'presentiere D'Enscheidig vo üsem neue Trainer stoht D'Mehrheit findet, es wird dr dunkelrot
B	Back-Engpässe – vo wäge!	Ob ar Chilbi oder Turnshow, sie ghö wie warmi Weggli Ob Turte, Cake oder Zimetschnäggli Döu bache no zuesätzlich, was für nes Glück Üsi Fraue, jo s'isch d'Wucht, beherrsche au das Kunststück
C	Cupcake-Gnuss	Es Cupcake für aui, ar GV zum Gluscht, fürs Jubiläums-Johr git das grad ganz vüu Luscht aui schätzes, mi freut sich ufs Feste und danke em Vorstand härzlich für die tolli Geste
D	Diskret und schützenswert	Aktzeptiere düe mers, es wird billigt Unterschriebe und dermit au igwilligt Dateschutz heisst s'Motto bim Verwende vo Date und üsne Foto
E	Erkenntlich zeigen	Dr Verein bedankt sich bi de Ehrenamtliche uf spezielli Art mit eme Cupcake-Workshop vo Linda's Art Was würde mer au ohni euch aui mache am Schluss dir sit super und hauet dr Verein im Schuss
F	Fabelhaft	Wie seit me so schön, Erfahrig chunnt mitem Auter Fit+Fun Fraue drähie uf dr Schauter bi dere Hitz, s'isch doch e Chrampf doch Freud überwiegt bim Sieg im 3-teilige Vereinswettkampf
G	Girl-Power	Nume d'Meitschiriege isch gange

		As Verbandsturnfest nach Wange Es lauft wie gschmiert sie heis idr Hang Mit Können und Erfolg turne sie zum 4. Rang
H	Hoch hinaus	D'Wandergruppe stoht im Glied ganz stramm alässlich vom DR-Summerprogramm vom Balmberg füehrts üs über Hängebrügg nachere chline Sterkig au wieder zrügg
J	Jubidubidu-uuu	Kei Falte und graui Hoor, wie isch das wohr Jungblibe und beweglich fiire mir 90 Johr Üse Verein, wird gfiiret bim Stüdeli unge Ganz fiirlich, mit vüune schöne Erinnerige verbunge
I	Idee-Schatz	Usem Volle schöpfe sie's die Power-Fraue Ihri Idee und Umsetzig, mi darf ne traue Sie danke a aues, Deko, Kostüm und au a Liim Das aues machts möglich üses Kreativ-Team
K	Kreativer Kreis	Punkt, punkt, Kreis und no e Strich Mir mache's aui Caro's Aleitige glich Es entstöh mit viel Elan, und Spontanität Charte vo de Ehremitglieder mit huufe Kreativität
L	Lotto-Glück	Perfekt organisiert, mi isch es gwöhnt Het's doch erstuunt, mir si worde überrönt Drum hei mers gno doch ganz glasse Es tolls Resultat zeigt sich jetzt i üsere Vereins-Kasse
M	Muki adé	Muki isch passé, jo es isch wohr üses Agebot heisst Elki ab däm Johr Mir ghö mit dr Zyt und passes neu a Damit er au Teil dervo isch, dr Papa
N	Nasse Angelegenheit	Mi ghört se vo witem, die Fraue lafere Wenn sie im Hallebad so umeschwadere Mit vollem Isatz - aui mache mit Unger dr Leitig vor Sybille bim Aqua Fit
O	O sole mio	Schön isch es gsi – la vita e bella erläbt ganz vüu, e huufe zum verzella Mit debi au dr Phippu am Stüür ufeme witere DR-Vereinsreis-Abentüür
P	Pizza-Spass	Üsi riife Fraue turne und trainiere lückelos mir finge euche Isatz eifach grandios famos

		dr perfekt Mix – das het Klass zwüsche düre no e Pizza im Bella Terrace
Q	Quer-Erfolge	Sit Johre mache mer mit am Quer d’Usbüting isch gross, sogar sehr Wenn scho die Chliste springe Dür üsi Stadt und au das Johr gwinne
R	Ranking	Ob ar RMV, ar KMV oder am Turnfest au d’Jugend het gäng ghä ihres Best so hei mer mit üsere Leistig dr Stämpfu ufdrückt und mängs guets Resultat isch so üs glückt
S	Schlagerparty und Schneegestöber	Jo, was wott me eigentlich no meh Aus zäme Spass zha im wisse Schnee 11 Turner:inne si derbi – mi macht au s’Chalb im Skiweekend uf dr Klewenalp
T	Turnliebi	Weisch was, was macht üs us Vielfalt wiene bunte Bluemestruss mir heis guet und finge zunang dr Droht es muess es si, üsi Liebi zum Turnsport
U	Unglaublich schön	Es chlises Dorf, chli ab vom Schuss Turne ghört z’Lommiswil drum derzue, es isch fasch es Muss s’wird turnet, glachet, mi isch derbi Zueghörigkeit vo jung uf gläbt, i üsere Dameriegi
V	Vollgepackt in Verona	Volls Programm, wie immer in bella Italia Degustation, Schifffahrt und Romeo und Julia Doch eis s’isch nid aune sis Ding wenn Täsche sich vermehre bim Power-Shopping
W	Wer hat ihn gesehen?	Mit witzige Sketch und turnerischer Vielfalt chunnt s’Publikum i Gnuss, fasch ohni Halt so stöh alli, vo Jung bis is hohi Alter uf dr Bühni ar Turnshow zu «Wo ist Walter»?
X	X-Mas	Es brucht jo eigentlich gar nid viel gueti Lüt, e fiirliche Rahme und es Schätzspiel wie aui Johr au es offerierts Znacht Ir Grabachere a üsere DR-Wiehnacht
Y	Yoga	Es isch verrückt, es isch sooooo heiss gspüre duet me gar dr Füdlischweiss

		doch mir hei Spass es isch nid gloga bi Regi Bucher's Stund mit Yoga
Z	Zum Schluss	Schön isch gsi, ig has gnosse im Fau gäng sehr Euch jewils z'brichte us dr Chronik, was für ne Ehr Zum Schluss säg ig danke und «ig bi raus» Gibe mis Amt ab ad Julie Freiburghaus